

2011

Mer hän nüüt z'lache und nüüt z'gumpe
Nach em Jubi simmer am verlumpe.
Nei nei mer hän die Kohle nid versoffe
es sisch eifach numme ganz dumm gloffe
au Devise hän mer links liege gloh
Kei Hasch und härteri Droge gnoh
z'viel Gäld hän mir in d'WM investiert
wär hätt denn dänggt das d'Schwiz dä spanisch Stier kastriert

An dr Gmeinsversammlig goht's wieder mol heftig zue und här
das isch bi so wichtige Theme jo nid so schwär
Do echauffierte sich gwüssi wenne um so supermegawichtigs goht
wie wo nachem Chöplistadionbau am Schluss dr Robbidog stoht

Alles automatisch goht nid chunnt do e liiwand vomene Maa
schliesslich hett mes friehner au nid so easy gha
E Idee isch do zum dä Rase z'trimme und für dr besti Schnitt
Statt e Rasemäiher kaufe nimmt e Jede Si's Nagelschäärl mit

E Sondermarke für d'Jodler spaltet fast d'Nation
e Technojodlere isch druffe was für ne hohn
mir hän eini für dr Gadaffi gmacht nid zumen necke
vorne isch e Arsch druff und hinte chaner ne Lücke

In Basel hetts bi de Transe brennt und d'Führwehr isch cho
Mer hän in allne Zyttige Fötteli gseh und gläse dervo
Wär das Hinterteil nid so mega knackig gsii
Hätts am änd no chönne unsere Minu sii

Kenne dir das Gschichtli schooo vo däm arme Dütsche do
wo in de letschte Johre so truurig isch unter d'Räder cho
Är hett sich drumm für zwo Fläsche Schnaps es Tussi gnoh
so ischs für ihn schlimm usecho so isch är is Unglück cho
Wo är sich fühlt fortissimo isch drumm si denn grad dervo
hett uff em Schiffl e andere gnoh sie händ se gfötteleet lustig und froh
Denn hett är sie aber subito hurtig schnäll und grad verloh
und sie isch ab das isch esoo hett ihre buse grad mitsich ghno
Uff eimol hett er se wieder gno und alli sind grad wieder froh
ohjeemineee danke mir do das goht sicher nid e lang esoo
Und d' Moral vo dere Gschicht e Moral die gits do nid
Dumm bleibt dumm mir bleibe derbi s'miesst jo nid dr Matthäus sii

Uff de Strosse simmer jetzt amigs scho chli verwirrt
doo 500 links dort 200 rächts, wieder zrug, mer hän is scho verirrt
bi uns führe sie eim längs isch das nid Famoos
Normalerwies sin Zebrastreife doch quer und über d Stroos

Jetzt sitz ane und halt Klappe
hättsch halt chli friehner zue mer cho sott
wenn ich an das dank chunnt mir e Träne
jee Dr. Schwager was wirtsch Du uns fähle

Obe schiffts und unde seichts
sone Wätterbricht dä Bricht dä breichts
Hinde haglets und schneits vo Basel bis uff Mulhouse
mir sage scho lang löhnd ändlich dr Kachelmaa wieder use

Ständig bini krangg und ha dr Schnuppe
dr Kopf schmäz und mi Hals macht weh bim schlugge
e rooti Nase zmits im Gsicht isch gar kei Gnuss
immer wieder bini verkältet sit ich im Dorf Tempo 30 laufe muess

Unsere Hakan die Fuessbalbire
het mit all dene Papier nid chönne gschiere
statt bim FCL, mr dien nid übertriebe
her är e Vetrug bim Dschungelcamp unterschriebe

Vücher, Larve, Spinne, Maade
und das alles uf mi nüchtere Maage
nur neume dueni bi so Tierli nid drvo springe
wenn mr in dr Beiz e Holzwurm duet dr Waggis bringe

Alles fährt Ski alles fährt Ski, Ski fährt die die ganzi Nation
Alles fährt Ski alles fährt Ski, es meint es könnst jede Clown
Mer fahre die Hügel in jedem Fall
mer sind zwar nümm so dr Hit
do bleibe mer lieber bim Fuessball
Ah nei das chönne mer jo au nid

